

O‘zbekiston Respublikasi Milliy statistika qo‘mitasi
Samarqand viloyati statistika boshqarmasi kengashi to‘g‘risidagi
NIZOM

I. Umumiy qoidalar

1. Boshqarma kengashi rasmiy statistikani rivojlantirish, faoliyat yuritish va muvofiqlashtirish muammolari bo‘yicha kollegial maslahat organidir.
2. Boshqarma kengashi davlat hokimiyati organlari, ilmiy jamoatchilik, jamoat tashkilotlari va statistika bo‘yicha milliy ekspertlardan tuziladi.

II. Boshqarma kengashining vazifalari

3. Boshqarma kengashining asosiy vazifalari quyidagilardan iborat:
 - statistika sohasidagi amaldagi qonunchilik ijrosini ta‘minlash va ilg‘or xalqaro tajribani hisobga olgan holda, statistika tizimini samarali tashkil etishda ko‘maklashish;
 - mamlakat milliy statistika tizimida umumiy tushunchalar, ta‘riflar va tasniflarni izchil qo‘llab borish;
 - statistika organlari, statistika ma‘lumotlarini yuritish vakolatiga ega bo‘lgan davlat tashkilotlari hamda boshqa davlat organlari va tashkilotlarining rasmiy statistika sohasidagi faoliyatini muvofiqlashtirish;
 - milliy statistikani rivojlantirishning ustuvor yo‘nalishlarini belgilash, innovatsion yondashuv va texnologiyalarni joriy qilish, metodologiyani takomillashtirish va statistika faoliyatining asosiy yo‘nalishlari bo‘yicha tavsiyalar berish;
 - rasmiy statistikaning eng muhim tamoyillariga, birinchi navbatda, statistik axborotning ishonchliligi, xolisligi, qulayligi, oshkoraligi va ochiqqligiga rioya etish bo‘yicha chora-tadbirlarni amalga oshirish, statistik hisobotlarni to‘plash, qayta ishlash va umumlashtirish tartibiga har qanday aralashuvni istisno etuvchi statistika ishlarini tashkil etish tizimini yaratish;
 - statistik axborot sifatini oshirish, xususan, milliy hisoblar tizimi ko‘rsatkichlarini va ularni hisoblash metodologiyasini xalqaro tashkilotlar tavsiyalariga muvofiq takomillashtirish;
 - rasmiy statistik axborotlarni ishlab chiqarish jarayonlarining Milliy modelini va GSBPM xalqaro standart modeliga muvofiq, sifatni boshqarishning zamonaviy usullarini joriy qilish;
 - statistik ma‘lumotlarning ochiqqligi va oshkoraligini ta‘minlash orqali statistik salohiyat ko‘rsatkichi reytingini oshirishga qaratilgan chora-tadbirlarni amalga oshirish;
 - xalqaro statistika tashkilotlarining elektron ma‘lumotlar bazalari va maxsus nashrlarida O‘zbekiston Respublikasi to‘g‘risidagi statistik ma‘lumotlarni joylashtirishga qaratilgan xalqaro hamkorlik va axborot almashinuvini rivojlantirish;
 - statistika organlari, shuningdek, idoraviy statistikani yuritish bo‘yicha

vakolatli davlat organlari faoliyatining natijalarini har yili ko‘rib chiqish, statistika kuzatuvlarining respondentlarga bo‘lgan yukini kamaytirish, ularni unifikatsiya qilish, soddalashtirish va optimallashtirish maqsadida statistika hisobotlari va kuzatuv shakllarini, shuningdek, uslub va tasniflarni qayta ko‘rib chiqish;

mamlakatda milliy iqtisodiyotni va ijtimoiy sohani isloh qilish jarayonlarini hisobga olishda ishonchlilik va to‘liqlikni ta‘minlashni inobatga olgan holda Statistika ishlari dasturini shakllantirish;

statistik to‘plamlar va byulletenlar nashrini tashkil etish, ularni ommaviy axborot vositalarida keng yoritish orqali statistik axborotning ochiqligi va oshkoraligini ta‘minlash.

III. Boshqarma kengashining funksiyalari

4. Boshqarma kengashi asosiy vazifalaridan kelib chiqib quyidagi funksiyalarni amalga oshiradi:

hukumat, davlat hokimiyati va boshqaruvi organlariga statistika siyosatining barcha jihatlarini bo‘yicha maslahat berish;

milliy statistika faoliyatining ishonchlilik, xolislik, beg‘arazlik, qulaylik, oshkoralik va ochiqlik kabi asosiy tamoyillarini amalga oshirishda ko‘maklashish;

statistik ma‘lumotlarni to‘plash, qayta ishlash va umumlashtirish tartibiga har qanday aralashuvni istisno qilishni ta‘minlash;

statistika ishlari dasturi loyihasini ko‘rib chiqish va u bo‘yicha xulosalar tayyorlash, uni amalga oshirish masalalarini monitoring qilish va hal qilishda ko‘maklashish;

statistik metodologiyani takomillashtirish va ma‘lumotlarni shakllantirishda foydalanuvchilar ehtiyojlarini hisobga olish masalalarini ko‘rib chiqish;

statistik va iqtisodiy tahlilning zamonaviy uslublarini, xalqaro standartlarga mos va bozor iqtisodiyoti tamoyillariga javob beradigan ko‘rsatkichlar tizimini amaliyotga joriy etish bo‘yicha ishlarni tashkil etish;

davlat statistika organlari faoliyatiga innovatsion yondashuvlar va zamonaviy texnologiyalarni samarali joriy etish;

sifatni boshqarishning zamonaviy xalqaro usullarini hisobga olgan holda rasmiy statistika ma‘lumotlarini ishlab chiqarish jarayonlarining Milliy modelini ishlab chiqish va joriy etishga ko‘maklashish;

O‘zbekiston Respublikasi Milliy statistika qo‘mitasiga yuklatilgan vazifalarni to‘liq va samarali amalga oshirishda ko‘maklashish.

IV. Boshqarma kengashining vakolatlari

5. Boshqarma kengashi yuklatilgan vazifalarini bajarish uchun quyidagi huquqlarga ega:

davlat hokimiyati va boshqaruvi organlari, idoralar, korxonalar va tashkilotlardan davlat va idoraviy statistikani takomillashtirish bo‘yicha belgilangan tartibda ma‘lumot so‘rash va olish;

davlat idoralari vakillarining axborot yig‘ish jarayonlarini tashkil etish

masalalari, shuningdek, so'ralayotgan axborotlar bilan rasmiy statistika va (yoki) idoraviy hisobotlarda mavjud ma'lumotlar o'rtasida takrorlanish holatlarini aniqlash va bartaraf etish borasida amalga oshirilayotgan ishlar yuzasidan ma'lumotlarni ko'rish va hisobotlarini eshitish;

Statistika Kengashi vakolatiga kiradigan masalalar bo'yicha o'z yig'ilishlarida mulkchilik shaklidan qat'iy nazar, boshqa tashkilot vakillarining ma'lumotlarini eshitish;

rasmiy statistikaning ayrim masalalarini ko'rib chiqish uchun ekspert komissiyalarini tayinlash;

Statistika kengashi hamda ekspert komissiyalarining yig'ilishlariga statistika masalalari bo'yicha vazirliklar, davlat qo'mitalari va idoralarning vakillarini taklif etish.

V. Boshqarma kengashi faoliyatini tashkil etish

6. Boshqarma kengashining tarkibi Milliy statistika qo'mitasi raisi tomonidan tasdiqlanadi.

7. Boshqarma kengashi a'zolari ularning kasbiy malakasi va statistika sohasidagi salohiyati asosida tayinlanadi.

8. Boshqarma kengashini boshqarma boshlig'i boshqaradi.

Boshliq bo'lmagan taqdirda uning vazifasini uning o'rinbosarlari yoki kengash a'zolaridan biri boshliqning farmoyishi bilan amalga oshiradi.

9. Boshqarma kengashi boshlig'i quyidagilarni ta'minlaydi:

statistika ishlarini yuritilishi, rivojlanishi va statistik axborotdan foydalanuvchilar bilan aloqa masalalari bo'yicha Statistika kengashining samarali va maqsadli ishlashini;

Boshqarma kengashining yillik dasturlari va ish jadvallarini ishlab chiqish va tasdiqlashni;

Boshqarma kengashi ish jadvaliga muvofiq, Statistika kengashi majlislarini o'tkazishni;

Boshqarma kengashi faoliyatini tashkiliy-texnik qo'llab-quvvatlashni.

10. Boshqarma kengashi faoliyatini tashkil etish bo'yicha zarur hujjatlarni tayyorlash va rasmiylashtirish Boshqarma kengashi boshlig'i tomonidan tasdiqlanadigan kotibiyat tomonidan amalga oshiriladi.

11. Boshqarma kengashi majlislari uning a'zolari umumiy sonining kamida uchdan ikki qismi miqdorida kvorum mavjud bo'lganda vakolatli hisoblanadi.

12. Boshqarma kengashining qarorlari majlisda ishtirok etayotgan Boshqarma kengashi a'zolarining ko'pchiligi ovoz bergan taqdirda qabul qilingan hisoblanadi.

13. Boshqarma kengashining qarorlari Boshqarma kengashi boshlig'i tomonidan tasdiqlanadi.

Qarorlarning ijrosini nazorat qilish Boshqarma kengashi kotibi tomonidan amalga oshiriladi.

Boshqarma kengashining faoliyati va uning qarorlari ommaviy axborot vositalarida yoritiladi.